

東
華
續
錄

東華續錄

同治八十四

臣王先謙敬編

臣張式恭恭校

二月丁酉朔丁寶楨奏訓練營伍章程並酌加月餉允之○戊戌諭內閣卞寶第奏請開缺回籍終養一摺覽奏情詞懇摯本宜俯如所請惟念卞寶第自簡任福建巡撫以來辦理一切俱臻妥協未便遽易生手卞寶第著毋庸開缺賞假三箇月回籍迎接伊母赴署該撫於視事之餘晨昏侍奉既無負朝廷委任之意兼可慰該撫孝養之恩毋再固請卞寶第起程後福建巡撫著英桂兼署○庚子諭軍機大臣等蘇鳳文奏勦辦遷江游匪各情形等語廣西遷江縣所屬巴梧村地方爲匪徒蘇大振等盤踞經知縣田斯杰等督率兵練馳往勦捕殲斃該匪首及夥黨多名忽有游匪由

貴縣交界闌入崇山村旋經副將潘其泰等擊敗而貴縣復有土匪嘯聚宜化縣屬同古屯零等村與廣東靈山交界處所亦有匪徒勾結粵西伏莽未清亟宜隨時撲滅著蘇鳳文嚴飭各該地方文武督帶兵團認真接剿務期殄除淨盡毋畱餘孽並著瑞麟李福泰一體飭屬不分畛域嚴密合剿毋任各匪勾煽以遏亂萌將此由五百里各諭令知之○辛丑左宗棠奏正月二十五日接劉松山十四日來牘據稱初十夜四鼓吳忠各營飛報有馬步賊千數百名由東南胡家堡竄至秦渠南距石家莊一帶空堡及馬五馬八條馬七寨劉松山以石家莊距吳忠堡東南四五里該各寨扼秦渠之要與下橋永甯洞水口緊接地勢在所必爭立督步隊四營及親軍馬隊馳返吳忠堡天明抵石家莊見賊已於西南廢堡修成三壘劉松山飭提督譚拔萃周國勝李占椿易致中曾松

明朱德開副將趙彩照等三路齊進各指一壘奮力齊攻一鼓克之其東西兩壘賊逸出者投入馬五寨劉松山卽令易致中朱德開李占椿分駐三新壘計斃陝回甘回一千數百名頭目馬幅喜亦經焚斃生擒七十二名正法軍前弁丁陣亡者三十七名受傷者一百零七名收隊後劉松山周覽正南馬五寨正東馬八條馬七兩寨牆厚壕深殊不易攻畱之則終爲後患遂令各營偏寨築壘以便圍攻二十三日壘成十四日飭各營齊隊往攻未下午後忽有援賊馬步約二千餘自東南馳至排列營前二三里以時日考之當卽臨洮謝四及靖遠馬龔子也劉松山慮其入寨助守以抗官軍適是夜金運昌已將馬殿魁各寨攻克斬甚多十五日商令金運昌先勦援賊黎明各路齊出步賊陣於各破莊之前騎賊左右排列布隊甚整劉松山令先勦騎賊李占椿趙彩照

分左右鈔擊火器迸發刀矛繼進騎賊先奔步賊仍屹立不動劉松山揮各軍奮威衝殺賊殊死鬪屢卻屢前騎賊仍縱馬回撲官軍銳氣百倍縱橫盪決斃悍賊甚多賊始向東南胡家堡一帶竄遁沿途冰淩凝滑馳走不前官軍追殺五里乃收隊計共斃馬步悍賊近千名劉松山傳令乘勢攻馬五寨寨大而堅悍賊踞寨東一卡誓以死抗劉松山飭譚拔萃周國勝李占椿曾松朋攜攻具攻寨飭易致中朱德開趙彩照帶所部截馬七寨馬八條寨來援之賊商令金運昌率兩營列隊該寨東北防馬五寨逸出之賊布置已定譚拔萃等揮所部由寨邊繞出徑薄外卡一鼓齊登克之外卡悍賊百數十名無一脫者劉松山急督各弁丁舉薪焚寨門策馬由寨下督攻益急忽爲寨中飛子洞中左乳墜馬弁丁負入破屋中譚拔萃等聞統領受傷齊來省視劉松山叱令速督所部

猛攻毋庸顧我亂行列譚拔萃周國勝曾松明李占椿見統領受傷含淚而出手執火包四面梯登督各弁丁猱附繼上縱火延燒見賊卽砍寨賊焚死溺死墜牆墮井死者無數生擒賊目馬五收隊繳令劉松山諭以受傷已重不得復活爾等殺賊報國我死不恨言畢氣絕是時攻馬七寨馬八條寨之隊仍未撤也據劉錦棠等會稟前來臣接閱之餘悲悼不已竊維劉松山由湘鄉勇丁從征積功洊擢廣東陸路提督轉戰各省勦辦長髮捻回各巨寇無役不從無戰不克自入靈州以來蕩平堡寨五十賊巢九十餘皆策馬前行躬冒鋒鏑回逆之曾犯顏行者無不聞名膽落上年七月初師由花馬池前進時馬化澂潛調西甯馬尒三嗾撤回助逆馬尒三以千五百騎應未及一月經劉松山勦敗喪其大半遁歸自此西甯逆回不敢復至西甯鎮總兵黃武賢前來營時爲臣具

道其詳彼時劉松山不辨其爲西甯回番與各堡甘回未形諸公
牘也河州逆回馬占鰲前在甯夏大言以股眾助陝回及劉松山
屢捷目覩軍威不敢復逞故此次馬化澂求援於臨洮謝四及靖
遠馬聾子而河回未與之俱其威震西陲如此臣方冀靈州戴役
奏請駐師甯夏以取猛虎在山之勢爲西陲規久遠不料事未了
而忽有此變也其治軍嚴不尙苛察其臨財廉不肯苟取其布陣
方圓平銳疊用得古人靜如山動如水之義其居心仁厚而條理
秩如語及時局艱危輒義形於色不復知有身家性命從征伐者
十有八載僅因募勇歸籍一次家居十餘日耳年已三十有七聘
婦未娶者二十餘年臣由直隸西旋時知其婦家送女至南陽已
兩年餘矣屬其行抵洛陽於募勇未到之暇剋期完婚適甘肅土
匪二十萬蔓及延榆綏一帶臣飭其派隊由山西渡河入秦劉松

山奉檄卽行屆婚期甫半月耳觀人於微雖古良將何以過之合無仰懇 天恩飭部將劉松山照提督陣亡例從優議給卹典加恩予諡飭祀京師昭忠祠並准陝甘各省建立專祠而以所部陣亡各員弁附祀其劉松山各處戰績並乞宣付史館立傳表彰以慰忠魂其遺櫬一俟道路疏通 臣當派員護送歸籍又奏劉松山馬步全軍員弁勇丁均湖南人而籍隸湘鄉者尤多於此時而謀接統之將非能調護諸將而才堪一面之奇者不可查有見在總理該軍營務布政使銜卽選道法福凌阿巴圖魯劉錦棠本劉松山之姪隨同劉松山轉戰各省於用兵機宜夙有領會膽略甚優在該軍總理營務已久軍情拿服堪以接充總統惟老湘一軍營哨各官多已保至提鎮總統之員非位望稍崇不可劉錦棠自晉入陝由陝赴甘戰功卓著本應保獎之員可否仰懇 天恩先賞

劉錦棠京銜以資鎮壓伏候 聖裁又記名提督頭品頂戴瑚松額巴圖魯黃萬友與劉松山同爲予諡壯武前布政使銜卽選道王鑫舊部見在該軍辦理營務穩練勇往素得軍心堪以派充幫辦臣謹檄飭遵照以定軍心又奏金積堡地勢平衍賊所恃以穩抗官軍者秦漢二渠耳兩渠導源大河皆由西而東匯而北仍入大河渠尾之要在下橋永甯洞地屬靈州劉松山上年八月郭家橋大捷後急爭此地故不爲賊所困昨兩次援賊之來未入金積而先向東南似其詭謀仍注意於此劉松山所以急起勦之也渠首之要在龍王廟峽口地屬中衛峽口高於渠身距雷正綰駐營之處四十里雷正綰未及豫防十三日忽有逆回突至修築三壘比雷正綰周蘭亭督隊馳往鏖戰竟日而三壘未拔弁勇傷亡乃至二百餘名之多臣得報後急飭陝安道黃鼎率所部及提督周

紹濂兩營丁賢發兩營八成隊伍於護運軍糧之便星馳往剿查
馬化澂所居之堡牆高且厚外環深濠兩道勢難力攻臣曾與劉
松山商及非引渠灌堡不可引渠非俟春暖冰融不可如黃鼎此
行能奪回峽口之要兼採中衛之糧則猶在驚蟄以前各軍不爲
賊困且可制賊也惟劉松山所部糧食短絀雷正綰周蘭亭張福
齊徐文秀各軍之糧均盼臣處轉輸已有朝不謀夕之勢金運昌
一軍則更無可望此大局之最可憂者合無仰懇 天恩飭定安
速籌運解金順將所部封存之糧暫爲借濟俾湘卓兩軍不致因
飢潰散則事有可爲大局之幸至郭寶昌上年赴晉實帶所部步
隊兩營馬隊一百同去據稟已呈請山西撫臣乞假養病而昨接
金運昌來稟則有請飭郭寶昌勿藉口養病致誤大局等語查郭
寶昌赴晉之前曾稟稱力顧金運昌運道而後此未聞解運一次

軍糧其徒託空言已可想見宜金運昌有此不平之鳴應懇 天

恩飭山西撫臣傳諭郭寶昌於河冰銷化晉防解嚴之時迅卽渡

河將吳堡存糧百數十萬斤解赴花馬池以資接濟 上諭內閣

左宗棠奏提督剿賊大勝中礮陣亡懇請優卹予諡建祠一摺廣

東陸路提督劉松山於正月初十日督軍進剿甘肅石家莊回匪

攻克該逆新修各寨斃匪一千數百名復進攻馬武寨忽有援賊

二千餘名排列營前十五日劉松山會同金運昌迎剿擊斃馬步

悍賊約千名餘匪竄遁攻破外卡各軍一鼓齊登劉松山策馬督

攻甚急忽寨中飛子洞中左脅受傷甚重卽時陣亡劉松山由勇

丁轉戰湖南等處十餘省剿平粵捻各巨寇謀勇兼優無愧名將

此次西征回匪策馬前行躬冒鋒鏑該逆聞風膽落方冀攻克金

積堡掃蕩而前肅清邊圉不料中道陣亡覽奏曷勝悼惜劉松山

著照提督陣亡例從優議卹加恩予諡入祀京師昭忠祠並於陝甘等省立功地方建祠所部陣亡各員查明一併附祀該提督各省戰績並著宣付史館立傳其遺櫬回籍時著沿途地方官妥爲照料以示朝廷軫念忠勤至意尋予祭葬世職諡忠壯○諭左宗棠奏提督劉松山陣亡後該軍統率需員查有布政使銜候選道劉錦棠膽略尙優軍情翕服堪以接統請賞加京銜等語劉錦棠著賞加三品卿銜接統劉松山舊部用資鎮率○諭軍機大臣等左宗棠奏請飭定安等速解湘卓兩軍軍食等語劉松山金運昌兩軍軍食缺乏左宗棠因雷正綰等軍須爲接濟無暇兼顧著定安金順懷遵前旨代辦糧食駝隻迅籌接濟左宗棠所稱金順所部封存之糧約有若干如於此項糧石內撥解更爲迅捷見在該軍正在喫緊之際斷不可稍分畛域致有貽誤金順於撥解後卽

可咨商定安籌款購糧陸續運往以備存儲郭寶昌一軍見在晉省防河正當喫重未便前往其吳堡所存糧百數千萬斤著劉典查明派委妥員分起解赴花馬池以資接濟毋許遲誤劉松山陣亡後該處軍情若何金積堡何日可以攻克劉錦棠已賞加三品卿銜接統其軍該大臣務當隨時激勵毋令勁旅頽廢提督黃萬友准其派爲幫辦以資得力回逆東竄邊馬已及大荔等處陝省畱營甚少左宗棠務當撥兵迅速援應不得置之不顧陝西日來情形若何能否攔截匪蹤毋使紛竄著劉典隨時據實奏聞並飭各營將弁加緊截剿力埽兇鋒晉省西南河防緊要並著李宗羲檄飭李慶翱勤加偵探毋稍疏虞沿河各邑人心是否敕定務當嚴密布置毋涉張皇將此由六百里諭令知之○諭英桂卞寶第奏查明臺灣洋案請將主謀構釁之蕭瑞芳等懲辦一摺據稱英

國領事吉必勳洋弁啞噹前在臺灣安平地方違約滋事各案經該署道黎兆棠查係廩生許建勳副將蕭瑞芳爲之主謀以致洋人藉端生釁見在許建勳冒開洋行私販樟腦日引洋人深入內山蕭瑞芳私造戰船希圖出海請卽拘案懲辦等語臺灣爲商賈輻輳之地人情浮動今許建勳懷挾私嫌膽敢重賂洋人從中搆煽蕭瑞芳身任武職大員竟至偷見啞噹煽其開礮占署釀成巨案實屬目無法紀若不從嚴懲辦何以禁遏內奸蕭瑞芳許建勳均著先行斥革英桂等卽密飭黎兆棠迅將該二犯一併嚴拏正法以絕後患惟該犯等與洋人聲息相通而必麒麟因扣畱樟腦一案屢唆駐京英使向總理各國事務衙門曉瀆此事辦理之後該洋人能否不至另生枝節滋擾地方該督等惟當責成黎兆棠妥爲辦理將此由五百里各密諭知之○諭總理各國事務衙門

奏俄國擬差員商議邊界事務請飭妥辦一摺據稱該國東悉畢爾總督欲於本年春間差員前往齊齊哈爾吉林等處與該將軍面議邊界事宜請飭該將軍等相機妥辦等語吉林黑龍江等處本無議定通商口岸該國意圖貿易屢次堅求同治五年間已有輪船駛入松花江上游之事且有在黑龍江夾心灘種地刈草各情此次復欲派員往議邊界事務如其循理按約自不妨酌量允行若係違理背約之求定當力爲維持嚴行禁阻著富明阿德英體察情形俟該國委員到時務須婉言開導不得稍有遷就至相待之禮不妨示以優容一切相機而行妥善辦理原摺均著鈔給閱看將此由五百里各諭令知之○以沈桂芬署吏部尙書

由左都御

史

署察杭阿兼署工部左侍郎

由禮左署

○壬寅諭軍機大臣等劉典奏

水陸各軍剿賊獲勝見飭山內各營設法兜剿等語回酋馬正剛

股匪圖渡渭河經副將陳瑞齡等擊勦該逆折竄洛西蒲城地界
又經總兵張佑庭夏奉朝等沿途追勦斬馘甚多悉向北山竄走
其竄入甘泉之匪復由勞山東竄兼之回逆由甘肅靈環下竄者
未必非圖擾陝境陝西延榆綏各屬土匪游勇日久蔓延屢經諭
令劉典認真按勦見在回逆竄入更恐勾結爲患著劉典嚴飭劉
端冕劉聲集張佑庭等實力兜勦迅圖殄滅左宗棠亦當飭令夏
奉朝等會合夾擊務將該匪就地殲除毋畱餘孽儻令該匪再行
肆竄卽惟左宗棠劉典是問北山一帶見有匪蹤晉省河防更形
喫重著李宗義懷遵屢次諭旨飭令李慶翱郭寶昌督飭在防各
軍嚴密堵禦毋稍疏懈見在陝西腹地雖無賊蹤甘肅進攻金積
堡各軍糧運梗塞著劉典迅速設法疏通以濟軍食將此由五百
里各諭令知之○乙巳諭軍機大臣等劉典奏擊敗延榆綏屬境

竄回見籌調營會剿暨劉端冕所部剿賊獲勝各摺片回逆馬正和等由金積堡出竄安邊分撲靖邊堡勢甚兇悍成定康會同彭緒烝出隊合擊該逆擁眾環攻復經官兵擊敗賊始東竄西來逆股亦向邱家坪竄去其竄擾米脂東北城門之賊旋經該處民團擊退見在葭州境內及榆林屬之鎮川堡一帶均有回蹤劉典擬調各營會剿著卽嚴飭劉厚基攔頭堵截並迅催宋慶抽撥勁旅跟蹤會擊務將此股殲除惟回逆此次竄陝股數既多而自西迄東其勢又甚剽疾陝氛一日不靖則甘事益費周章左宗棠身總師干不得稍存膜視仍著懍遵前旨添撥得力隊伍星馳入陝會同劉典所調各軍併力掃蕩毋任日肆蔓延米脂葭榆各境與甘疆相距非遙該省河防喫重李宗羲亦當遵奉疊次諭旨檄飭李慶翱郭寶昌督率在事將士實力嚴防毋稍疏虞馬正剛一股

走洛川復橫出鄜甘交界之道左鋪疊經官兵追擊斃賊甚多回
逆馬呼來等句結土匪游勇由宜洛交界之孟家背竄至邵陽又
經官兵擊敗分竄韓城澄城等處卽著劉典迅飭傅開德等率隊
躡追一面飛咨馬德昭渡渭夾擊毋稍遷延其由清澗境內圖擾
腹地之馬正和一股並著催令李輝武等各率所部相機兜剿北
山一帶爲土匪游勇伏匿之所此時回匪縱橫難保不互相煽惑
肆行滋擾劉典務當振刷精神督飭在陝諸軍力圖撲滅不得藉
口兵單致滋延誤榆林靖邊各邑逼近邊牆竄突堪虞著定安機
飭防軍於鄂爾多斯各旗境內嚴密堵剿毋任滋擾將此由六百
里各諭令知之○予陝西陣亡總兵官劉求益祭葬世職湖北殉
難道員王東槐建祠○丙午諭軍機大臣等定安奏回蹤分竄見
擬調派勁旅疏通糧道一摺昨據劉典奏榆綏境內均有賊蹤當

經諭令劉興派兵攔擊並令迅催宋慶抽撥勁旅跟蹤會剿茲據
定安奏稱竄陝之賊分股肆擾花馬池至榆林迤西迤南一帶湘
皖各軍糧道隔斷甯夏郡城以北及平羅縣等處回騎充斥石觜
山邊外賊匪出沒靡常以致金順張曜兩營軍火糧餉皆形梗阻
見已飛咨宋慶選派得力將領簡率精銳四五營由纏金後套沙
金托海一帶埽蕩而前疏通糧路等語所籌尙合機宜卽著督飭
宋慶派出各軍迅速前進與邊內外馬步諸軍會合剿辦務將北
路竄匪悉數芟鋤庶糧運可通金順張曜二營不至掣動卽湘皖
各軍亦有饋餉之路實於全局有益惟宋慶一軍駐紮神木籌辦
河防近又派隊馳赴榆林葭州等處截擊竄回此次分撥西援恐
該軍轉形單薄仍著定安斟酌緩急情形妥爲辦理毋令顧此失
彼宋慶一軍勢難分撥卽著定安於防軍內酌派前往俾資得

力邊牆防守緊要定安務當凜遵昨日諭旨檄飭各軍於鄂爾多斯旗境內嚴密堵剿毋任滋蔓將此由五百里諭令知之○戊申諭軍機大臣等李宗義奏官軍防守河西剿賊獲勝並剿捕土匪情形各摺片回逆竄擾陝西米脂葭州綏德等境意在阻截糧道窺伺河干經提督蔣東才督兵馳赴米脂縣東馬家溝等處奮力剿擊大獲勝仗餘匪竄往綏德一帶著李宗義知照宋慶仍飭蔣東才等確探賊蹤相機進剿所有出力各員并准由李宗義擇尤酌保河西土匪擾及呼家寨等處經郭寶昌派兵過河接剿斬獲多名惟宜川所屬之交口等處尙有賊蹤我軍後路亟應防其包鈔且交口等處均距晉境不遠該匪旣思偷渡河防尤應嚴密著李宗義檄飭在防將弁加意梭巡毋稍疏忽並飭郭寶昌督率將士隨時確探認真防剿將此由五百里諭令知之○諭穆圖善奏

平番被匪闌入旋即克復派隊駐守及西固城等處被匪攻破後收復撫恤情形並遵旨駐省籌防各等語平番縣被回逆環攻入城經提督張萬美督兵進攻殺斃甚多該逆由北門逃竄其大股賊匪尙踞河西亦經張萬美帶兵擊剿該逆向小沙溝狂竄張萬美又追殺二十里洵屬奮勉可嘉莊浪營兵雖因缺額過多而被賊衝下足見接戰不力且賊匪上城該文武臨時始行殲其平日玩忽可知殊堪痛恨著穆圖善查明並陣亡殉難紳民兵勇及杜家堡被陷情形咨明左宗棠嚴辦該將軍見飭營總正福所帶馬隊駐紮平番會同張萬美妥爲防堵惟逆匪東西奔突官軍不敷分派亦屬實情著左宗棠酌量分兵防剿以期周密至西固城新城堡距省甚近見雖賊蹤遠遁而防範不可稍懈著穆圖善卽飭帶兵各員嚴密防堵並一面籌給牛力籽種以安民業穆圖善

駐守省垣兵勇尙多每月需銀十萬兩卽著左宗棠轉咨袁保恆
按月撥解的餉十萬兩交穆圖善支放毋稍短絀將此由五百里
各諭令知之○諭恩麟德泰奏錄呈廓爾喀國王表文請議給總
噶箕藏格巴都爾王銜一摺該總噶箕藏格巴都爾在廓爾喀國
內辦理一切事務是否可靠朝廷未及周知如賞加王銜之後該
處番民是否翕服日久與中國體制有無窒礙不至夜郎自大之
處著恩麟德泰切實查明據實具奏不得敷衍目前致貽後患所
有應給該總噶箕王銜及頒給敕書各件均俟該大臣等覆奏到
日再降諭旨將此由五百里各密諭知之○諭恩麟德泰奏錄呈
廓爾喀國王表文懇請飭議一摺本日已諭知恩麟等詳查具奏
所有應給該總噶箕藏格巴都爾王銜著內閣理藩院先行擬定
漢字譯出廓爾喀文字奏請欽定並將應行頒給敕書辦齊俟恩

麟等覆奏到日再降諭旨廓爾喀國王表底及恩麟等給軍機處密咨一件著發給該衙門閱看將此各諭令知之○己酉回逆援阿拉善旗飭金順嚴防○辛亥諭軍機大臣等定安奏殺軍截剿竄匪獲勝見籌分路防剿一摺回逆竄擾陝西米葭等處經提督蔣東才擊剿獲勝定安此次奏報與李宗義前奏情形大略相同卽著定安咨會宋慶飭令蔣東才確探賊蹤乘勝追剿毋任紛竄宋慶見派提督劉廷率所部五營馳赴包頭剋日西進定安因河冰迫泮凌汛將來該軍西渡或尙需時先令劉景芳帶領馬勇馳赴纏金沙金托海一帶會合烏爾圖那遜探明賊蹤相機截剿並飭保英馳赴舍太一帶扼紮以爲後路援應兼杜西來竄匪著卽督飭劉景芳等迅速前進先通糧路俟劉廷軍到纏金劉景芳卽會合進剿痛埽賊氛俾運道暢行無阻榆林以西邊外草地間有

賊匪出沒並著飭令達爾濟成章聯絡聲勢合力擊剿其沿河薩托清一帶並飭馬陞等嚴密防範毋稍疏虞近日軍情著該將軍隨時奏報將此由五百里諭令知之○壬子諭內閣協辦大學士湖廣總督李鴻章著帶兵先赴陝西督辦陝省援剿事宜俟陝西肅清仍卽馳赴貴州督辦軍務○諭軍機大臣等見因陝西回逆分竄關中留兵不敷分剿已明降諭旨令李鴻章先赴陝西督兵剿辦矣西路回逆分竄秦境蔓延榆綏延各屬該處土匪潰勇本未芟除淨盡深恐勾結爲患左宗棠西駐平涼離陝已遠而北攻金積堡南顧秦州兵力亦屬不敷況劉松山陣亡良將漸少邊外糧運之路又無兵可以保護是該大臣支絀情形深可垂念雖歷次降旨令左宗棠派兵赴陝諒亦因前敵喫緊無可抽調李鴻章本令督兵入黔其月餉早經籌定而郭松林等軍尙屬不少且

援陝之師無須大支勁旅不必與諸將領面商再行定議卽著就見有之兵先行統帶入陝剋日迅速前進將竄陝各回逆悉數埽除並著扼要駐紮與定安李宗義劉典所派各軍聯絡聲勢加意防範毋任逆蹤肆意東竄其北山土匪潰勇並著派得力之師次第按捕淨絕根株俾左宗棠得以專心辦理甘肅軍務不至有跋前疐後之虞所有甘肅回匪卽責成左宗棠督勦務當廣籌方略將金積堡等處迅圖克復埽蕩而前以紓朝廷西顧之憂左宗棠定安李宗義劉典亦當隨時與李鴻章和衷商酌益臻周密金順勦辦王家疃莊近日能否得手務與張曜竭力進攻毋得遷延觀望甯靈距定邊不遠亦當與李鴻章隨時關會免致疏失李鴻章俟陝境肅清再行督兵赴黔以靖邊隅本日據袁保恆奏老湘卓勝兩軍飢疲之餘所存不過十之五六請飭歸併等語該兩軍旣

多缺額他營亦所不免見在餉項短絀豈可任其冒濫著左宗棠統飭查明覈實歸併以節餉需將此由六百里各諭令知之○諭前因黔省苗逆未平命李鴻章督辦貴州軍務川黔楚各軍均歸節制見在甘肅逆回竄擾陝境左宗棠駐軍平涼勢難兼顧本日已明降諭旨令李鴻章先赴陝西督辦軍務俟陝西肅清再行赴黔督剿李鴻章未到貴州以前曾璧光責無旁貸著卽督率地方文武認真防剿崇實等前奏川軍進剿功在垂成入春可圖大舉劉崐前奏席寶田亦已赴營著崇實吳棠劉崐嚴飭川楚各軍會合黔兵實力剿辦該將軍督撫等各宜振刷精神毋得專待李鴻章到黔致軍務稍涉鬆懈將此由六百里各諭令知之○以雪澤稀少詔緩徵直隸山東上忙錢糧○飭催各省迅解西征欠餉○甲寅諭軍機大臣等劉典奏回逆分途竄擾疊剿獲勝並賊竄北

山各營防剿情形各摺片回匪馬呼來一股擾及同官宜君等處經張佑庭等督隊追剿該逆由楊家店向甘境狂奔另股馬長瀛等由宜川竄偏澄城復經張佑庭擊退韓邵地境又有大股賊匪竄擾劉端冕見已追抵韓城著劉典卽飭劉端冕張佑庭等視賊所向合力夾擊迅圖撲滅北路延榆綏一帶賊蹤經喻步蓮等督軍追剿並未大加懲創劉典因李輝武所部未便調令遠征見已添募陝勇千人剋日成軍著卽添派得力將弁統帶前進迅速剿辦此時老湘卓勝兩軍糧運梗阻回逆益肆狡猾若不迅籌掃蕩恐前敵各營軍心不固大局何堪設想著左宗棠速將慶環一帶妥爲布置杜賊紛竄之路務使運道疏通官軍無後顧之虞方可一意進剿該大臣老於戎行諒不至漫無籌畫坐失事機也安定擊敗之賊竄至延水關該處偏近河干雖經晉省防軍會剿南竄

難保不去而復來著李宗義檄飭防河將弁嚴密堵禦至韓卻澄

各屬沿河地方漫灘處多尤應加意防維毋稍疏忽將此由五百

里各諭令知之○以靈桂署兵部尙書

由左都御史署

萬青藜兼署兵部

尙書

由禮部尙書署

○以故喀爾喀扎薩克貝勒巴彥巴圖爾子堆固爾

蘇隆襲爵○予陝西陣亡知縣李廷獻等祭葬世職建祠典史毛

福昌祭葬世職附祀○予陝西被戕在籍知縣喻夢蘭祭葬世職

○丙辰諭軍機大臣等前因奎昌奏瀝陳塔城分界實在窒礙情

形當交總理各國事務衙門議奏茲據奏稱該大臣所陳六難兩

弊雖非全屬虛詞而塔城所屬地方豈可任其淪陷請飭該大臣

恪遵前旨先行派員前往查勘並著酌擬辦理等語前派奎昌將

塔城分界事宜妥爲會辦嗣因俄人在哈巴爾阿蘇私立鄂博復

經諭令按照圖冊詳細查勘有無侵占若如該大臣此次所奏各

情未免因難退縮其愚何可勝言卽著奎昌迅派明白曉事之員先行查明該國所立碑石是否與同治三年明誼所定紅綫相符如其中有被侵占之處並著繪圖貼說迅速奏聞酌覈辦理不准再涉推延貽誤大局原摺著鈔給閱看將此由五百里諭令知之○諭總理各國事務衙門奏法國使臣藉兵要挾漸不可長請飭各省遇有外國案件持平速結並飭地方官於傳教事件先事防維列入考成及請飭江蘇福建迅辦英國未結各案各摺片上年法國使臣羅淑亞因四川等省教案未結自行出京攜帶兵船赴安徽江西等省不過數月各案俱結該使臣見在同京傳教各案牽涉民人卽係地方官分內應辦之事乃積習相沿因循推諉日久不結致令該國使臣藉兵要挾此風何可漸長且恐奸民乘機簸弄更形掣肘而中國官吏辦事泄沓之風亦足貽誚外洋著各

該將軍督撫通商大臣等嚴飭所屬遇有中外交涉事件卽認真
查辦持平迅結毋得仍前延宕致外國人得以藉口況見在英國
使臣威妥瑪鈔錄上海新聞紙以羅淑亞催辦各省積案有效爲
詞則該國未結各案豈可聽其遷延著文煜英桂卞寶第馬新貽
丁日昌將臺灣販運樟腦等案剋日辦結毋貽該國使臣口實嗣
後各該省遇有交涉案件並著各該將軍督撫飭屬勒限完結以
弭後患至傳教一事流弊固多而地方有司如能先事圖維經權
互用未嘗不可杜其干預著各該將軍督撫大臣等密飭地方官
遵照前次總理衙門通行成案悉心體察豫爲經理儻能辦理妥
協卽准其與催科撫字一例考成以冀挽回積習用弭釁端原摺
片單共四件均著鈔給閱看將此由五百里各諭令知之○飭馬
新貽等籌撥黔餉○丁巳允文煜等奏免購運京倉米石釐稅○

諭李宗義迅解烏科臺站經費銀兩○戊午諭軍機大臣等定安奏嵩武軍剿賊疊勝金順奏官軍攻拔王家疇附巢賊壘暨剿辦北路竄逆情形各一摺王家疇莊踞逆恃有外援屢於正月十七等日糾黨竄撲均經金順張曜督隊擊退其馬步援賊亦經官軍奮力截剿被創敗逃辦理甚爲奮勉卽著金順會同張曜督率各軍乘此聲威步步進逼攻拔堅巢至金順所奏上年十二月間攻克附巢四壘情形業據定安奏到大略相同官軍奮勇爭先深堪嘉尙第軍士陣亡至一百二十餘名受傷至六百餘名實深廛念金順等務當於勇往之中寓慎重之意庶精銳不至漸耗沙金托海以西賊蹤出沒無常各營軍火糧餉時形梗阻定安已飭保英馬隊馳赴舍太一帶駐紮並由宋慶派撥五營令劉廷督帶由哈拉寨啟隊卽著定安飭令劉景芳一軍卽日西進會同各軍

將北路竄匪悉數芟鋤疏通糧路並督飭馬陞等沿河各隊嚴加防範毋稍疏虞金順另片奏河南候補道汪景度歷著戰功請交部存記等語汪景度著交軍機處存記將此由五百里各諭令知之○予甘肅陣亡提督楊春祥祭葬世職建祠○已未諭丁寶楨撥解運河工需銀兩○庚申諭故廣東陸路提督劉松山於湖南本籍建祠○辛酉諭軍機大臣等金順奏同眾被嚇變亂糾合陝回滋擾請飭豫軍來甯會剿並請飭山西籌撥餉銀軍火及擊期踞援各回獲勝河狄逆回北竄請飭撥黃金山所部糧餉各摺片甯郡昌貴各堡降回馬萬選等爲馬化澂誘使復叛窺伺城防並圖擾絕糧路經金順督率常福等軍鈔擊該逆遁回新渠見在甯郡防兵無多陝甘各回屬集甯靈宋慶一軍素稱得力自應移緩救急以資應援著定安李宗羲咨令該提督親率十數營兼程赴

甯會剿其古城皇甫川一帶仍著留營駐守後套一路亦關緊要並著定安迅飭烏爾圖那遜督率馬隊會同嵩武軍防營於磴口至石嘴山一帶往來梭巡以杜逆蹤旁竄王疇回眾雖屢經金順張曜督軍擊退而黃河西岸各股賊匪均欲分路援救河狄賊目又率眾北來已距金積堡不遠米拉溝逆回亦至中衛之西蘆塘地方是甯靈各軍內外均受牽掣非將甘回截擊甯境不得肅清著左宗棠斟酌情形迅撥勁軍將河狄出竄之賊相機剿洗毋使挾眾北來致甯防益形棘手其平羅縣城卽著金順檄令王玉山趕緊前赴實力防守王家疇莊見經官兵圍紮該署將軍當會同張曜穩慎進攻計取堅巢毋徒耗傷精銳甯軍糧餉兩缺定安卽飭歸綏道無論何款先行籌糧六千石雇覓駝隻交宋慶護帶前往仍一面催令該提督整隊西行毋稍延緩金順所派副將鄧得

勝等在晉催提糧餉卽著李宗義迅籌銀十萬兩並火藥二萬斤及火繩鉛丸等件交該委員等星解回營以資應用黃金山所部見在畱防中衛待餉甚殷著袁保恆查明該軍應領餉項趕緊如數撥交委員陳祥勝承領派員解甯轉給不可稍涉推延致有譁潰之患將此由六百里諭知左宗棠定安金順李宗義並傳諭袁保恆知之○予前浙江布政使沈兆澐重宴鹿鳴賞頭品頂帶○壬戌諭軍機大臣等都興阿等奏游民滋擾朝鮮派員查探一摺朝鮮國碧潼城管小坡兒鎮地方突有游民前往搶劫燒毀民房六七十家聚集至七百餘人械鬪滋事該游民由渾江口過江何以該管員弁毫無覺察似此玩愒因循不但啟外邦輕視之心且恐匪徒紛紛出境肆擾致肇釁端尤屬不成事體奕艾見已就近帶員出邊著飭令嚴密偵探務將滋事根由詳細查明相機妥辦

不准敷衍了事協領毓昌既統馬隊赴孤山附近彈壓遇有前項游民竄遁立即查拏懲辦以安地方至古尼音布等本係辦理邊務之員此時邊外既有游民生事自應趕緊出邊及早經理著都興阿等迅卽催調毋任遲延該將軍等仍當隨時認真查辦以肅邊防將此由五百里各諭令知之○癸亥諭軍機大臣等李宗義奏回逆竄陝晉省兵勇憑河堵擊一摺前因賊匪竄至延水關該處逼近河干並以韓邵澄各屬沿河地方漫灘處多諭令李宗義加意防維見在賊匪二三千人由韓城西鄉竄出山口分擾榆林茶峪等渡口因晉防嚴密旋由朝邑退竄同州之莊里村該處距河仍近著李宗義懍遵前旨檄飭防河將弁嚴密布置實力梭巡不可稍涉疏懈賊匪驤南向有擾及腹地之勢劉典務當督飭各軍覘賊所向認真掃蕩迅殄逆氛北路延榆綏等處賊情奚若

並著劉典嚴飭喻步蓮等軍迅速剿辦毋令該逆日肆蔓延將此
由五百里各諭令知之○乙丑諭軍機大臣等劉典奏官軍截剿
北山回逆疊勝並擊敗馬呼來回股暨遵旨疏通運道請飭蔣東
才移紮甯條梁各摺片北山回逆經劉端冕各軍擊敗後奔竄大
荔華州等境復經官軍擊退旋撲高陵繞由涇河上游西竄張佑
庭等連戰皆捷該逆敗走武功李輝武又於乾州武功交界地方
敗之逆眾亂竄見在劉端冕等分路追擊陳照臺由藍屋沿河扼
剿卽著劉典嚴檄諸軍乘勝前進與吳士邁所部分投兜擊以期
悉數殲除北山爲匪徒潛伏之區雖經喻步蓮等追擊獲勝而山
路紛歧誠恐官軍遠去土匪游勇又復勾結滋擾該署撫仍當督
飭喻步蓮等軍實力接捕毋令萌蘖潛滋馬呼來一股訶知馬長
鳳等擾及韓郃回踞楊家店經黃超羣等夜擣賊巢敗向石底子

竄去復聚踞轉角地方陳鴻藻等率隊圍攻殺賊殆盡並追賊至甘肅正甯縣屬之山河鎮該逆竄向甯州勦辦尙屬得手其馬長鳳等股此時是否竄擾同境仍著劉典檄飭在事將士確探賊蹤合力剿洗以保腹地甯條梁爲運道所關該署撫請將蔣東才五營移紮該處騰出成定康一軍進駐定邊自係爲疏通糧路起見惟前據金順奏甯靈軍情緊急已令定安等咨令宋慶赴甯會剿並畱營駐守皇甫川等處以固晉防該軍營數無多勢難將進駐義合之蔣東才五營遠爲移紮左宗棠見抽張福齊所部六營回陝防剿卽著該督酌量情形再籌一軍會同張福齊及靖邊鄜州各營互相聯絡俾糧運得以暢行其石灣靖堡甯條梁等處存糧著劉典卽飭成定康等運赴前敵以資接濟龍錫慶旣令挑選降卒編立四營著飭令認真訓練毋得有名無實將此由六百里各

諭令知之○諭前因肅州回匪不時出關擾害恐成祿帶兵不能得力諭令左宗棠派員往查並諭成祿將存營兵勇嚴加裁汰聽候諭旨茲據該提督奏稱存營兵勇裁汰後尙存三千一百名久經行陣可期得力若使長征實屬不敷候旨遵行等語關外地方遼闊三千兵勇原屬不敷分布儻令成祿另行添募未必有裨實用而藉端索糧擾累地方恐先在所不免且所部兵勇及收撫回眾亦不能恪守軍律前據文麟景廉參奏已諭該大臣派員赴肅州查明卽著迅速覆奏毋稍遲誤關外哈密巴里坤二城獨力難支能否派得力之軍先行出關與文麟等協力駐守仍著左宗棠恪遵前旨統籌全局隨時具奏成祿應否撤回或酌留該大臣軍營其所部勇丁三千餘名是否可以畱用抑或遣撤之處均著左宗棠平心覈議據實奏聞將此由六百里諭令知之○諭奎昌奏

安插厄魯特人眾請仍照舊章辦理一摺前據錫綸奏厄魯特人眾不願東徙業經妥爲安插其後集人眾方議安插青格里河而該人眾值放賑之期不到者五百餘人查係自行東徙烏里雅蘇台所餘一千數百人亦漸次行動此項人眾既願東徙自不如因勢利導俾得相安無事著福濟榮全於該人眾到烏後仍照前奏五處分安章程迅籌安插分散約束毋使滋生事端以弭後患至此項人眾究由何處聚集科城何以錫綸前奏該人眾不願東徙今又紛紛徙去並著福濟等查明具奏其餘未徙人眾應如何安插之處卽著奎昌文碩妥籌辦理將此由五百里各諭令知之○丙寅諭軍機大臣等左宗棠穆圖善奏中衛防兵擊賊獲勝見飭援剿北路一摺甘肅中衛縣境突有回匪五百餘人由沙坡衝出攻撲民堡經總兵黃金山派隊迎擊賊匪敗遁復於大板槽地方

擊敗竄賊防勦尙爲出力惟據擒賊供稱此次係米拉溝撤回率眾欲援金積堡並斷中衛糧運分股先來探信等語逆謀詭譎恐其大股續來乘虛竄突亟應嚴密堵截以遏狂氛黃金山所部見因雷正綰軍接仗失利已帶兩營前往援救自係先其所急著穆圖善飭令該總兵迅卽督隊疏通北路將廣武峽口相機攻復毋令賊匪久踞中衛地關緊要所有畱防各營尤宜加意防守以期周密至雷正綰接仗敗挫廣武峽口被賊盤踞未據左宗棠奏報見在該處軍情賊勢若何著該大臣詳細查明具奏雷正綰兵力較單該大臣仍當隨時策應毋稍膜視將此由五百里各諭令知之○是月展緩山西太原等三縣歉收帶徵錢糧暨民借倉穀三月丁卯朔實授英翰安徽巡撫○戊辰諭軍機大臣等定安奏殺軍截剿竄匪獲勝一摺回匪在準噶爾旗雪背溝地方攻撲炭

竊經宋慶所部之總兵馬玉崑等各率馬步分路進剿斃賊甚多旋追至鎮羌以西山內官軍各處接捕敗匪潛竄無蹤據獲賊供西南草地尙有大股賊匪馬玉崑等已派弁偵探宋慶並擬率領麻地溝古城所駐各營前往督剿著定安仍懷遵疊次諭旨催令宋慶督率所部迅速赴甯會同金順各軍將甯靈等處竄匪力圖掃蕩並疏通北路運道如西南草地果有賊股分擾卽飭令馬玉崑等相機兜擊其達爾濟等所帶馬隊並著定安迅飭該總管等馳往會剿以期遏賊東趨毋稍鬆勁將此由五百里諭令知之○己巳諭軍機大臣等都興阿等奏續查游民滋擾朝鮮啟釁原委並添派官兵拏辦一摺前因朝鮮國碧潼城管小坡兒鎮地方突被邊外游民前往搶劫燒毀民房各情當經諭令都興阿等將滋事根由查明妥辦茲據奏稱本年正月間有朝鮮人夫十三名用

牛爬犁十三張由渾江口過江割草被該處墾地游民拏獲匪徒吳思會等將其十三人斃命朝鮮復有人過江燒毀墾地窩棚該匪等率領人眾攻破朝鮮小管平城焚燒民房二十餘處擄掠軍器財物潛回前陽石柱子等處盤踞又將朝鮮過江人傷斃數名見派員前往查辦等語渾江口一帶地方多與朝鮮接壤防範尤應嚴密今該匪等膽敢過江焚掠傷斃多人若不及早拏辦何以慎固邊防該將軍等自應遵奉前旨催令奕艾迅速馳往相機妥辦並檄飭豐恩等酌帶馬隊官兵就近出鹼廠邊門各處曉諭墾地游民毋任匪徒勾結吳思會各犯見在盤聚石柱子等處都與阿等務飭豐恩等會同奕艾將各犯按名拏獲盡法懲治不准稍涉遷延致該匪等聞風遠逸復釀變端至嗣後如何嚴禁奸民過江滋擾之處並著該將軍等酌度辦理都與阿等業經飭令奕艾

將派員往查並見在辦理情形知會朝鮮義州官吏卽著禮部傳知該國王申明邦禁約束近邊人民嗣後遇有過江滋擾互相仇殺者亦須設法懲辦以期日久相安毋稍懈弛將此諭知禮部並由五百里諭知都興阿清凱麟書恩錫知之○允曾璧光奏免黔省運售鉛斤釐稅○展普濟堂功德林資賑兩月○庚午展五城資賑兩月○以興恩爲左副都御史由大理寺卿遷○壬申以喬松年爲倉場侍郎前任陝西巡撫○癸酉諭軍機大臣等劉典奏官兵追剿竄回疊勝陝省見無回蹤並馬正剛一股殲除殆盡及剿擊北山回土各匪獲勝各摺片回酋馬長瀛等股勾結游勇由北山竄入內地官軍追剿情形業經劉典先後馳奏茲據奏稱劉端冕各軍在韓城等處擊賊獲勝賊由臨渭一帶搶渡渭河均經水師擊敗高陵之賊經魏紀鑒等率隊敗之張佑庭李輝武諸軍又於醴泉武功

各境追剿屢勝該逆渡涇之後分路潛逃附入游勇亦已悉數衝散其奔竄甘境者僅數百人劉典見飭在陝各營於陝甘毗連處所嚴密設防馬正剛一股亦經劉端冕等追殺殆盡據逃出難民供稱馬正剛已被槍斃各等語此次回匪紛竄陝疆圖絕甘軍糧道劉典督飭諸軍追剿屢獲勝捷該省已無賊蹤剿辦尙屬得手刻下金積堡賊巢甘軍圍攻正緊其折竄甘境各匪難保不勾煽餘黨復謀東犯牽掣進剿諸軍左宗棠當督飭在甘將士將金積堡相機攻取並檄飭派出援陝之軍將折回餘匪攔頭截擊務絕根株近日甯靈一帶軍情若何著隨時據實具奏以慰厯繫劉典亦當嚴飭各處駐營力加防範不准稍涉疏虞馬正剛是否槍斃仍著確切查明此起零匪究係逃竄何處並著飭令在防將弁隨時偵探以期搜捕無遺清澗等處踞匪既經總兵田玉廣等殲除

淨盡而定邊西境及花馬池一帶復有回蹤並由安邊竄來逃勇一二百名在蔣家寨一帶盤踞甯條梁附近之呂家寨亦有逃勇一二百名是榆綏一帶防務尙未可鬆著劉典卽飭成定康等加意防維毋稍鬆勁惟陝省前次肅清之後凡地方騷擾半係土匪游勇勾結回逆此次安邊等處逃勇究由何營散出其從前管帶究係何人若任其紛紛肆擾後患何可勝言著左宗棠劉典分飭各路帶兵官弁設法擒拏並查明該管營官從嚴參辦一面將各處游勇妥籌安插分別遣散以靖地方將此由五百里各諭令知之○諭李鴻章奏遵旨赴陝援剿酌籌派撥一摺據稱西北地形平曠回騎飄忽非馬隊無以制勝已令郭松林派員趕募馬步隊共十五營周盛傳趕募馬隊四營並由鄂入陝餉項軍火遣員沿途察勘設局接運所籌均屬周妥著卽趕緊辦理以資援剿本日

據劉典奏陝軍追剿內竄回匪及附入游勇捕斬殆盡餘匪折竄甘境各情已諭知左宗棠等分別籌辦矣惟陝西畱兵無多甘回股數甚眾雖據劉典奏稱該省見無賊蹤而竄回餘匪難保不復行勾結東犯陝疆且據奏花馬池定邊甯條梁附近一帶尙有匪蹤亟應趕緊堵剿李鴻章著仍俟李瀚章抵鄂及郭松林等募練就緒時卽行督軍入陝妥籌剿辦至摺內所稱西安軍需局探報陝匪有竄鄂之說湘營潰勇陸續東來該督已令譚仁芳撥出兩營往紮河南浙川之荆子關要隘以扼商南竄路並分撥聯紮河口樊城以固邊防卽著檄飭該提督令在防將士實力嚴防毋令匪蹤闖入豫省距陝非遙尤須早爲堵禦著李鶴年迅撥勁旅會同鄂省所派各軍聯絡聲勢以遏寇氛其潼關一路並著飭令馬德昭悉心防守毋涉疏虞將此由五百里各諭令知之○丁丑諭

軍機大臣等福濟等奏赴烏厄魯特人眾俟查明辦理等語前據奎昌等奏此項人眾五百餘人自行東徙何以距二十餘日之久尙無到烏音耗究竟逗畱何處其餘一千餘人是否亦向東徙著奎昌文碩確切查明該人眾下落咨會福濟等辦理其未徙人眾仍應妥籌安插並著福濟榮全於該人眾到烏時仍照前奏分安章程分散約束毋任流離失所致生事端將此由五百里各諭令知之○諭李宗義採辦米麥各二萬石備李鴻章軍食○予陝西陣亡副將吳賢華等祭葬世職○戊寅諭軍機大臣等定安奏毅軍暫緩西移暨截剿雪背溝餘匪獲勝李宗義奏毅軍暫緩北進金順奏王家疃回眾乞撫湘卓兩營軍糧難籌接濟各摺片前因甯夏軍情緊急諭令定安等飭令宋慶赴甯會剿原係移緩就急之計茲據定安李宗義所奏雪背溝等處時有賊股紛竄宋慶一

軍亟須分投堵剿甯郡道路較前疏通劉廷等軍可數剿辦見在
榆北喫緊殺軍勢難驟離等語所奏自係實在情形是宋慶一軍
目下未便移動卽著定安李宗義知會該提督仍在神木一帶督
飭所部截擊竄匪以資得力定安金順卽督令劉廷會合劉景芳
烏爾圖那遜等軍沿邊進剿迅掃逆氛毋稍鬆勁王家疇賊匪見
在畏剿乞撫金順復勒定限期令其清繳馬械糧石並將悍酋等
縛獻始准就撫若能恪遵約束卽著金順設法羈縻騰出馬力肅
清北路惟仍須認真防範毋爲該逆所紿後路竄匪業經官軍屢
次擊敗金順見檄常福帶隊前往磴口等處搜剿並令汪德才紮
平羅曹正興等紮洪廣又商令張曜撥營扼紮黃渠橋等處布置
尙爲周妥仍著該副都統會同張曜隨時相機籌辦金順前曾撥
借劉松山金運昌雷正綰等軍糧石尙能不分畛域此時甯郡旣

難採辦轉運又難暢行自顧維艱實無餘力接濟湘卓兩營軍食
據奏各情尙非推諉所有湘卓兩軍糧食著左宗棠趕緊設法另
籌接濟毋令缺乏雪背溝逃竄餘匪經毅軍截擊獲勝尙爲出力
其波羅等處股匪著定安仍飭蔣東才盡力探剿免致蔓延孤山
鎮羌等處密邇河干李宗義當飭河防將弁認真堵剿毋任竄越
進攻金積堡諸軍聞有退駐吳忠堡之說左宗棠月餘未有奏報
殊深厯繫見在前敵軍情若何賊勢若何著該大臣據實詳細具
奏將此由六百里各諭令知之○辛巳左宗棠奏據劉錦棠黃萬
友稟馬化澂知劉松山陣亡喉金積堡逆眾圍犯官軍訊據賊謀
供稱賊之詭謀在犯吳忠堡營壘搶永甯洞水口阻葉昇堡運道
正月十七日五鼓劉錦棠派赴河西護糧隊伍遇伏賊於葉昇河
邊斬悍騎數名劉錦棠黃萬友會商吳忠堡至下橋地勢遼闊春

融冰泮下橋永甯洞水口尤形勢所必爭應移兵屯紮以昭穩固
峽口既爲賊踞賊得分洩渠水以灌營壘戒備不可不嚴二十五
日平羅接糧隊伍回營二十六日黎明整隊出擊適賊三四千出
金積堡排列東南提督王承贊諭執益曹義勝進左路提督李雲
貴潘運璋副將趙彩照進右路提督陶定昇易致中何作霖進中
路軍功董福祥爲後路策應部署既定適西路礮聲大震劉錦棠
黃萬友料峽口之賊已與官軍接仗也催隊急進東南步賊憑廢
堡穩抗不動馬賊分鈔兩旁鏖戰兩時之久官軍先將馬賊擊敗
併力壓步賊之前賊勢不支向正南敗走官軍乘勝躡殺陣斬悍
賊數百名生擒三十餘名弁兵陣亡十七名受傷六十三名湘皖
兩軍軍糧自東道梗阻均就河西採運賊騎每乘間鈔掠是夜提
督金運昌會商劉錦棠黃萬友各分兵夾河築壘以資防護二十

七日黎明兩軍隊伍甫至河邊見游騎數十自正東瞭望返奔而去少頃塵氛大起胡家堡甘回王洪等寨馬步三千餘眾擁而至金運昌督所部攻其左劉錦棠督所部攻其右相持未久左路馬賊先敗劉錦棠飭提督譚拔萃周國勝從右路鈔出步賊之後步賊復潰官軍兩路追殺五六里日暮收隊劉錦棠仍派提督李占椿率所部護築新壘二十八日壘成辰刻胡家堡之賊一千六七百名距營五六里而陣李占椿守壘金運昌迎敵正酣戰間劉錦棠率隊馳至併力壓擊追殺四五里而還兩戰共斃賊六百餘名劉錦棠所部生擒二十餘名弁勇陣亡二名受傷二十七名二月初二日黎明金積堡漢伯堡逆眾四五千迤南而東麕集板橋圍撲董福祥營李雲貴率隊助董福祥憑壘禦賊提督蕭章開督所部直貫賊陣銳不可當李雲貴董福祥自營內衝出夾擊賊駭

而奔官軍分途掩殺斃悍賊二百餘名生擒悍賊十餘名嗣是冰凍漸解野潦縱橫劉錦棠黃萬友相度地勢或開溝疏濬或築隄防堵金運昌駐軍金積西北界秦渠之東切近馬家灘早元堡賊寨初六日黎明早元堡逆回數千憑秦渠築隄設卡金運昌會合蕭章開何作霖易致中分三路剿之逾時金積各堡角聲四起援賊大至各營收過渠南嚴陣以待劉錦棠加派馬步助戰賊勢驕甚金運昌由右路沿隄衝擊劉錦棠分從左路迎剿自督易致中周國勝策應各路將士奮威衝殺賊敗過渠北蕭章開越渠擊之金積各堡繼出悍賊來援劉錦棠督何作霖併力猛撲該逆紛向老巢敗遁是役共計斃賊四五百名弁勇陣亡十七名受傷六十二名初八日陝甘各回傾巢而出騎賊數千先近板橋步賊一路出正北築壩決隄一路出正西撲金運昌營壘劉錦棠揮軍援剿

瞭見渠隄已被賊決水勢南趨渠北之賊甚厚金運昌迎剿之兵已阻於水正西賊眾林立冒死撲營劉錦棠分中左右三路梟水猛進軍士遇賊卽砍金運昌馬步應之黃萬友率陶定昇易致中周國勝越渠橫出賊前怒馬衝擊截賊爲數段正西馬步賊鼠竄歸巢正北之賊猶拚拒壩口黃萬友調開花劈山礮輪轟之賊始全數逸去各軍收隊漏已二下矣是役兩軍斃賊約千餘名弁丁陣亡三十一名受傷一百四十八名是夜金運昌以正北蔡家橋一壘距賊卡里許會商劉錦棠撥營聯絡以資控制初九日五鼓劉錦棠派步隊十營出正北修壘料賊必悉眾來爭約金運昌各伏兵渠南廢堡偃旗息鼓以黃萬友右路之兵列陣渠北劉錦棠督中路修壘相機應之天甫明金積各堡逆眾絡繹出巢擁至蔡家橋齊隊劉錦棠按兵不動戒軍士趕緊築壘一面準備擊賊辰

已之交賊有沿隄放槍者有越渠撲壘者伏兵起賊駭而奔渠內悍賊二百餘無一脫者中右兩路乘勝壓剿賊敗歸金積早元各堡而東南胡家堡王洪等賊復決開山水溝以淹吳忠堡赴河西運道劉錦棠令各營環壘修堰引注小渠合流入黃初十日午後各營正分段開決渠溝忽胡家堡及各寨步賊千餘騎賊一二百隔水搗戰官軍用開花礮測準擊之一轟而退二鼓渠溝通暢金積堡逆眾復搬磚石築卡於北環以長隄意在引馬連渠水困官軍十一日黎明劉錦棠金運昌令各營攜鋤鍤分道並進寨賊亦紛集隄邊抗拒官軍躍馬衝入賊陣當者辟易羣賊併向金積東門敗走官軍躡至堡外次第收隊平其卡而還連日之戰兩軍共斃賊七百數十名弁勇陣亡十一名受傷七十一名臣維劉松山陣亡後馬化澂竊幸官軍或難久與相持一面圖陷官軍一面上

稟乞撫據稱時屆春融未及耕墾請委員辦理撫局稟中微及陝回本意就撫因劉提督操之過急遂致中變見仍傾心求撫等情臣比批飭從來中國與外國爭戰原有燒荒及擾耕穫之事若甯靈本是中國土地人民漢回均是朝廷赤子與用兵外國不同無禁其耕墾之理前劉提督辦理勦撫並無舛錯卽再委員前來亦別無辦法察其情形亦似窘迫實甚陝回人馬餓斃已多釋買無出馬化澹存糧亦難久支柴草尤乏所恃以負固稽誅者惟秦漢兩渠之委在下橋永甯洞其導源則在峽口永甯洞已經官軍扼守司其宣洩賊雖決渠不足困我而峽口被賊占踞官軍不奪其所恃亦終無以制賊見擬由靖遠造船配礮乘河流盛漲駛攻峽口如果奪此要津庶足制其死命惟湘皖兩軍糧食告匱雖百計圖維終慮難於持久日夜焦思不遑寢饋又奏陝西提督雷正綰

提督周蘭亭正月十三日峽口之挫傷亡弁丁二百餘名經臣於二月二十七日附片陳明一面調道員黃鼎星速馳援務奪回峽口要地以重形勢旋據雷正綰報稱十五日至二十日賊勢日益猖獗連日守營出隊營哨各官多有傷亡而黃鼎赴援兼須護解大批糧運軍火二十三日始抵四百戶二十五日率親兵兩營隊伍剛抵甯安堡而所部三營尙隔一日之程比於甯安堡晤雷正綰前此派赴中衛護糧之營官提督閻定邦總兵陳義據稱賊勢圍逼甚急請速救援遲恐無及是日賊用大礮對雷正綰中營轟擊四哨哨官均被礮轟斃雷正綰堅守營壘督將士悉力抵禦待援黃鼎以事機緊急不候續到三營取齊商請周蘭亭帶所部列隊峽口之後張福齊帶所部列隊牛頭山副將楊正華列隊牛頭山口自率兩營親兵步隊桂錫楨副青旗馬隊及雷正綰所部馬

隊由牛頭山前進並飭閭定邦陳義裏糧隨後繼進以餉飢軍二十六日辰刻師進牛頭山見賊馬步數千正攻雷正綰營壘甚急黃鼎自牛頭山率隊壓下賊見官軍猛進卽解圍迎戰黃鼎揮所部數百人左右盪決賊紛紛敗走正追殺間忽黃渠內馬步伏賊齊出峽口賊亦由後鈔截官軍歸路黃鼎率總兵韋占雄參將朱蘭亭等皆下馬力戰短兵相接兩時之久斃悍賊甚多韋占雄忽中礮陣亡金積堡逆賊是日經劉錦棠擊敗後亦竄擁前來截阻牛頭山歸路黃鼎見賊勢頗重日影漸西乃與總兵劉治均游擊黃得勝等結隊徐退衝出山口副將吳啟雲楊正華各率所部擊退山上包鈔之賊雷正綰乘賊與黃鼎鏖戰率所部突圍出而峽口遂仍爲賊踞矣臣維秦漢兩渠皆由大河分注由永甯洞會流入河是永甯洞者渠之尾也兩渠皆導源於峽口爲渠之首金積

堡所恃以爲險者秦漢兩渠永甯洞雖爲湘軍所扼下流宣洩得以自由不致爲賊所困而峽口一被賊踞無以制賊而速戎機正月初三日劉松山晤商雷正綰周蘭亭張福齊徐文秀卽以峽口宜築壘扼住勿令賊占爲言雷正綰允其分營扼守遲至十二日始築峽口之壘壘成不卽派隊填紮致賊從河西履冰突至據所築新壘成此厲階咎本難辭惟忍飢苦戰十二晝夜將士有死傷而無逃散情事似有可原應請旨將陝西提督雷正綰革職畱任以觀後效周蘭亭張福齊兩軍於正月二十夜糧盡退回鳴沙州比黃鼎二十三日護糧至四百戶事已無及該兩軍由金積堡退軍時實因軍糧告罄領護軍糧後卽同黃鼎進援峽口與尋常值事者有間惟兩軍先退致雷正綰孤軍受敵退軍時又未告知雷正綰究屬咎有應得應請旨將題奏提督博奇巴圖魯周蘭亭提

督銜記名總兵達桑阿巴圖魯張福齊均撤銷勇號拔去花翎一併革職暫畱軍營差遣以明軍律黃鼎所部記名總兵韋占雄膽技優長每戰奮勇爭先當者辟易此次深陷賊陣徧體傷痕力盡捐軀實堪悼惜之至應請旨飭部照總兵陣亡例從優議卹以慰忠魂其雷正綰周蘭亭黃鼎所部陣亡將士應俟查明請卹見在雷正綰駐紮何家堡周蘭亭駐紮四百戶均進兵要路正飭歸併營伍切實整理以待再舉張福齊一軍已調回陝西臣因諸軍此次之退峽口之挫於全局大有關繫情罪不可不明非訪察確實未敢輕率入告是以陳奏稍遲又奏紛竄陝境之賊原祇兩路一路由金積堡東南翻山竄出環慶一路賊目爲海萬新藍明太馬正剛等人馬約二千餘經道員魏光燾提督劉端冕屢次截勦海藍等逆在甘境埽滅已盡馬正剛一股由三水入陝擾及蒲富同

朝一帶圖由澄白鄜甘歸巢經劉端冕扼剿數次擒斬殆盡馬正剛雖未就縛而所掠同朝騾馬衣物糧食則均奪回矣一乘河水合凍出邊牆繞陷定邊安定紛竄延榆綏近乃由宜川竄韓邠頭起爲逆目馬呼來劉端冕兩敗之擒斬約數百馬呼來敗竄楊家店轉角子等處復爲知府陳鴻藻總兵殷華廷等所敗又爲魏光燾及鎮原防軍總兵江得意楊大章所敗敗匪不過二百餘此股歸巢無幾頃接劉端冕報陝回馬阿渾等一股約二千餘由金積堡竄過靖邊安定延安一帶圖由韓邠竄鳳翔覓歸路宜洛一帶游匪土匪及譁潰之皖軍附之勢眾且悍劉端冕兩敗之然賊勢仍張署陝西撫臣劉典商調陝軍總兵張福齊率所部由四百戶地方回陝助剿臣雖飛檄赴調誠慮緩不濟急適中書吳士邁奉周開錫檄來平涼臣卽飭其率隨行一營赴乾州立調所部駐隴

州三營來乾會隊疊據各路稟報賊之零騎已蔓及咸陽醴泉武功岐山乾州一帶然劉端冕及陝軍各營已經署撫臣調由蒲城富平躡追而西李輝武所部由寶雞迎勦而東吳士邁由涇平乾州壓勦而南臣又飭吳士邁所部駐鳳縣兩營循渭水南岸出郿縣盤屋北赴乾州會隊並飭魏光燾截其由慶陽鎮原歸金積堡老巢之路見在延榆綏一帶及韓城郃陽同州續無警報以竄陝之賊實已全數西趨雖各處游匪潰卒絡繹奔走在注西路人馬之數亦不過三千有奇是由金積堡乘冰繞竄定邊一路入陝賊數約略可計疊經勦敗兇鋒漸減非必不可收拾者也安定定邊收復以後無重兵鎮壓本爲可慮然大河冰泮勢難飛渡金積堡北阻大河正東東北湘軍已夾河設守頃得金運昌稟報因軍食無出擬拔步隊四營回駐花馬池定邊就取鎮靖堡之糧似定邊

安定尙可無意外之慮至劉松山進兵時臣原飭每人持三月糧復於花定節節畱營轉運以資接濟嗣金運昌由綏德續進臣飭其到花馬池後停軍勿前於花定一帶畱營護運聽劉松山商調劉松山見皖軍銜接而來始調護運各營赴靈州吳忠堡各處以厚兵力其時吳忠堡金積堡連獲奇捷金運昌急於助剿而所部各營之散布定邊花馬池者又方以戰鬪爲樂運糧爲苦日求迅赴前敵金運昌亦以郭寶昌已於綏德買駱駝三百頭轉運吳堡存糧隨身尙有兩營步隊馬隊百騎堪資護運遂併定邊各營撤赴靈州由吳忠堡進紮金積堡郭寶昌帶所部赴晉並不知會金運昌撥隊回紮此定邊所以被賊襲陷也劉典於定邊之失專歸其咎於金運昌未爲確論至雷正綰周蘭亭兩軍之急進金積堡原因固原黑城李旺各城堡克復後金積堡陝回畏剿悉數西趨

維時臣有甯靈並無陝回之奏迨黃鼎由黑城子鹽茶廳橫出擊之大捷於打拉池城截賊爲兩禹得彥崔三馬生彥白彥虎等遂由郭城驛峴口竄狄道河州馬正和陳林余彥祿等由長流水甯安堡一帶復回竄金積堡臣檄黃鼎一軍及提督張會元楊世俊帶所部馬隊由靖邊南下以勦禹崔各逆而檄雷正綰周蘭亭所部馬步全軍截勦馬陳回竄各逆其簡敬臨張福齊兩軍分駐半角城韋州堡以撫新降回眾護北路糧運而斷外賊援應之路詎料簡敬臨張福齊於未接臣檄之前已拔隊由豫望城韋州堡越石溝驛而徧金積堡臣接其啟行緘牘飛檄止之事已無及又念簡敬臨張福齊卽遵檄邁返亦恐墮士氣而啟戎心不得已乃就見有兵力節節挪移向前以護運道鎮壓東西兩山新撫回民爲救敗之著此韋州豫望一路空虛無以扼賊奔衝陝回所以得由

環慶竄陝也劉典此次所陳乘勝銳進後路空虛者臣固早已慮及且緘告之矣至魏光燾之軍由慶陽環縣追捕土匪明七十子等向鎮原固原交界白家壩一帶而來非因臣調其護運且賊未竄慶陽之先魏光燾已回慶陽截剿竄出頭起各賊其竄慶陽屬之賊馬正剛一股亦經魏光燾派魏紀塋率所部前營隨同劉端冕剿之特未能遏其竄陝耳至四川道員曾傳理本殉節道員黃涓熙辦營務之員黃涓熙殉節後駱秉章派曾傳理統接其軍卒平蜀寇上年臣自直東剿捻西旋聞劉典札調曾傳理赴陝適臣營務乏員商調隨營辦理營務迨諸軍前進時臣令其赴牛角城督催各處轉運安輯良回亦曾見諸奏牘方李旺堡打拉池大捷時賊勢實極衰蹙馬化澂方謀移巢西甯避官軍之銳諸統將急思乘時自奮慷慨赴功各有風利不泊之意曾傳理於諸將領有

無商榷前進之語雖不可知至謂諸軍乘勝銳進由曾傳理督令所致則亦非確論臣自咸豐十年忝任軍寄軍中事無巨細均出親裁營務人員非別將一軍獨當一路遇有軍事皆須諮稟而行劉典相從最久知之已深臣豈獨於曾傳理任其顓恣且曾傳理入臣營未久諸將領亦未必降心相從由其指使頃張福齊自四百戶調歸西安臣面詰其因何輕進是否由曾傳理催促致然張福齊亦祇引爲己咎無異詞臣不敢諉過曾傳理爲分謗之計劉典與臣爲布衣交軍中共患難者十年矣臣於同治五年九月請簡派劉典幫辦軍務摺內曾稱其爲人剛明耐苦廉幹而有志節可保其斷不負國斷不厲民然性稍褊急有所見必達其是亦經據實陳明劉典自蒙恩簡署陝西巡撫以來其勤民憂國之忱人所共見減里差革陋規劾貪劣深洽輿情陝民聞其將去呈請署

西安將軍陝甘學政籲請奏畱署任其明徵也前以思親甚切引疾乞休拜摺後臣始有所聞欲貽書勸之而已無及嗣因陝回竄陝各路風謠四播羣言賊勢甚張倍深憂憤推求局勢之壞由於諸將輕進遂本所聞見上達 宸聰臣前疏稱其有所見必直達其是者卽此類也又奏陝甘各回磨聚金積堡近因乏食四出竄擾臣前因固原鹽茶廳所屬東西兩山南界平涼北界靈州周數百里回民居其大半中間良匪雜糅亟宜分別剿撫以規久遠遂擬設旌善營令已革壽春鎮總兵蘇如松督之擇良回軍功馬柏森穆進善李百寬等爲營官各帶土著馬勇分起駐紮給以薪糧馬乾隨官軍剿捕土匪客匪馬柏森本萌城回目上年官軍由平涼掃蕩而北固原州黑城子李旺堡豫望城等處回目經官軍剿敗各挈其黨遁歸金積堡葢舊奉馬化澂爲宗主者也豫望城地

勢北接韋州堡賊由金積南竄必經韋州堡以達豫望一過豫望則道路紛歧防剿均費兵力馬柏森者本萌城之良回於時瞰豫望回目馬萬春投入金積堡遂自萌城徙居之斬通逆小回目而輸誠於官軍截殺逆騎八十餘馬化澆穆生花恨其倍己又以豫望城爲逆回南竄要路必欲陷之噉馬正和率陝回馬萬春楊達姓率甘回併圍豫望城二月十三日馬柏森飛稟告急提督周紹濂及蘇如松由半角城率馬步隊急起援之十五日抵李旺堡十六日黎明由李旺前進甫三十里至馱驪腰線地方遇賊三四百騎周紹濂卽督隊分路猛撲斃賊五十餘名賊奪路狂奔蘇如松率馬隊先抵豫望城賊聞官軍大至翻山竄走十七日周紹濂抵豫望城則賊竄已遠忽回民走報是夜二鼓有賊千餘將阿布條回堡攻陷殺傷良回李萬梗等見猶踞堡搬運糧物周紹濂急率

所部擊之十八日馳抵楊家灣見賊踞對山齊放槍礮周紹濂督隊下山斃水而前飭副將周玉林由中路參將毛正明由左都司周曙良由右三路併進蘇如松率馬柏森及李百寬等旌善馬隊亦到分兩路鈔擊官軍衝上山梁賊亦由山梁下撲槍礮對轟官軍自下仰攻槍無虛發連斃執旗悍賊三名紅衣騎馬賊一名賊勢稍卻官軍一齊搶上山梁槍矛並進斃賊無數賊紛由山旁亂竄適旌善馬隊飛馳而至截斬悍賊數十奪獲賊馬十餘匹賊向阿布條狂奔官軍跟追及之堡中賊紛出迎拒官軍悉銳衝殺斃賊八九十名生擒二名賊棄堡下溝向老虎灣狂竄馬牛糧食拋棄滿地官軍進至老虎灣始收隊阿布條堡將所獲糧畜給還難民訊據生擒賊目馬生香馬柏壽等知馬正和等圖破豫望阿布條等處以擾李旺黑城子官軍運道因官軍速到豫望城適賊裹

糧已盡遂先陷阿布條擬飽掠後仍回攻豫望也周紹濂令馬柏森馳回豫望城籌守禦與蘇如松各率所部追賊十九日由欠溝門一帶接勦而來沿途頗有擒斬賊由王家團莊過河南竄李旺堡是日黎明攻圍李旺堡官營副將李光賓飭存營隊伍扼立垛口靜以待之賊欺官軍單薄併力猛撲數次李光賓俟其逼近測準轟擊槍無虛發賊每猛撲一次必傷斃數人乃解圍潰竄李光賓開壁縱擊連斃悍賊二十餘名斃紅衣騎馬賊目二名訊生擒馬八兒馬元娃供稱賊目一白姓一帥姓皆馬正和所帶東弭悍黨也是夜三鼓賊分股竄至黑賊子南三十里攻破何家溝良同何家位寨二十日黎明李良穆率所部馳擊甫近何家溝接總兵張大雄都司周曙良飛報賊之大股經李旺擊敗併竄黑城李良穆急掣隊回勦行十餘里見賊已越黑城十餘里而來似圖與何

家溝賊合隊李良穆帶所部橫截而出奮威衝殺賊駭懼失措紛紛潰走官軍乘勢壓擊斃賊甚多其何家溝一股自後衝出敗賊復回旗抗拒李良穆率所部搶入土堡一紅衣賊衝近堡門揮刀斬之又有紅衣騎賊領悍賊繼至經排礮轟斃賊始大潰官軍乘勢掩殺收隊回黑城子一面飛馬邀總兵張大雄都司周曙良前來會剿是夜三更賊折回北竄一股仍竄回東山二十一日子刻張大雄周曙良自李旺堡馳至中途遇賊賊見官軍至紛紛潰竄擒斬數十名昏夜未便窮追天明李良穆帶隊繼至則賊蹤已遠接獲落後賊李來娃子及趙三庚等僉供馬正和於二十日接仗時猝中礮子自鼻梁穿入腦後透出當經賊夥用綢旗裹擡逾時氣絕其弟僞元帥馬魁同時轟斃良同柯大有等所報亦同提督徐占彪在韋州花子臺一帶截剿馬正和敗回一股生擒逆賊馬

世英等均供馬正和頭受槍傷氣絕臣昨提訊李來娃子供詞尤爲確鑿是逆首伏誅已無疑義當賊之圖豫望也臣檄黃鼎所部提督徐占彪步隊三營馬隊一營馳往援勦黃鼎更以步隊兩營益之二月十六日由固原拔行十九日抵豫望城是日午刻馬柏森報有賊目李花喜馬有全蘇文舉李德隆率賊千餘由金積堡竄出章州過下馬關盤踞距豫望城四十里之吳家腦徐占彪等卽於是夜募食潛師夜起黎明行近吳家腦見該處峯高路狹非用眾之地總兵陳玉春趙興隆參將林定遠等飭馬柏森前行引路由王家山黑溝繞道抵虎家山麻兒灣設伏以待徐占彪率兩營徑捕吳家腦賊甫驚覺徐占彪揮軍縱擊斃賊百餘名擒賊六十餘名賊紛向虎家山敗遁徐占彪率陳春萬猛躡之甫抵虎家山陳玉春自山後截出林定遠由左趙興隆由右兩面鈔來將全

股賊眾裹在中央各營縱橫盪決馬柏森亦下馬步戰立將賊目蘇文舉擊斃生擒賊目李花喜馬有全並擒賊目鎖保鳳蘇成功馬海望李保成馬有保李有俊蘇成明馬得印等及悍賊七十餘名轟斃餘賊二百餘名墜崖死者無數二十一日收隊還豫望訊據賊目李花喜馬有全等供奉馬化澹穆生花命率領五營於十六日由金積堡竄出走韋州下馬關至豫望圍攻堡寨並探路徑如無大兵阻截卽率股分途赴陝擄糧見飭解營審訊此股賊目祇李德隆一犯漏網餘賊逸出者亦無幾矣二十二日馬柏森報稱馬正和一股經官軍痛剿敗歸金積堡已竄近下馬關二十三日徐占彪督步隊五營追之已刻抵下馬關見地勢平衍卽結方陣前進行十餘里遇賊各營奮威衝殺賊不能當紛向韋州敗遁追近韋州六七里殺悍賊五十餘名是夜詔賊麇聚花子臺徐占

彪以三營扼韋州堡自率兩營及馬柏森旌善馬隊潛起襲之賊倉卒不知所爲駭懼紛竄官軍乘勢掩殺斃賊無數生擒悍賊十二名其定邊環慶兩路竄擾陝西各股近由慶陽鎮原豫望一帶北竄歸巢均經各軍各營隨時隨地次第截剿斬獲頗多容俟確切察明再行馳報 上諭軍機大臣等金積堡踞逆經劉錦棠等軍擊敗後乘間鈔掠河西運道復經金運昌會同湘軍夾擊殺賊甚多二月初二日以後劉錦棠等在馬家灘板橋等處追剿馬步各賊屢獲勝仗該逆欲引馬連渠水以困官軍劉錦棠等分道並進賊向金積東門敗走各軍平卡而還見在劉錦棠等以吳忠堡至下橋一帶爲形勢所必爭移兵屯紮以爲扼要地步著左宗棠卽飭劉錦棠等將金積外援力圖遏截以期拔取堅巢峽口地方緊要雷正綰築壘旣遲又不派隊填紮以致爲賊所踞實屬咎無

可辭雷正綰著革職畱任周蘭亭張福齊率軍先退亦難辭咎均著撤銷勇號拔去花翎並革職暫畱軍營差遣該處爲秦漢兩案上游必須趕緊奪回方能制賊雷正綰見紮何家堡周蘭亭見紮四百戶尙屬進兵要路左宗棠務飭該提督等整理營伍設法進攻毋任該逆久踞如該兩軍再有遷延貽誤並著嚴參懲辦至前次定邊安定爲賊襲踞旣據查明金運昌暨簡敬臨張福齊等軍前進各節尙屬有因卽著暫行毋庸置議儻再有貽誤重情卽著從嚴參辦嗣後各軍進止務當嚴飭帶隊官恪遵將令毋得貪功銳進致誤事機曾傳理在營是否得力並著隨時查看毋稍遷就該大臣見擬由靖遠造船配礮乘河流盛漲駛攻峽口所籌甚是著卽分檄各路將士次第規取制賊死命陝回毗連處所時有回蹤游勇亦復滋擾劉典仍當懷遵屢次諭旨嚴飭在防各營會同

甘軍相機堵擊不可稍涉大意將此由六百里各諭令知之○諭
前因袁保恆奏老湘卓勝兩軍多有缺額當經諭令左宗棠查覈
歸併茲據左宗棠奏稱老湘營因疊次增募溢額頗多除分撥各
營外尙有餘勇待補缺額袁保恆所稱飢疲之餘見存不過十之
五六不知何指至該學士原奏以歸併節省之餉作續調兵勇之
用欲調何軍未與咨商見據英翰咨錄袁保恆召募原文並據潼
商道稟稱有豫軍入關後起亦將續至是否卽係袁保恆所調皖
豫舊部尙未可知此時陝境已無回氛新軍無可位置擬卽調赴
平涼安插其已募未到各軍卽請截止各等語兵事與餉事相爲
表裏袁保恆此次召募各軍何以不與左宗棠等往復籌商輒行
咨調實屬冒昧所有到陝新軍卽著左宗棠調往平涼編立成營
或分補各營缺額藉資調遣其已募未到之淮皖各軍並著張之

萬英翰一體截畱就地撤遣如已行至豫境卽著李鶴年派員截止咨明該省督撫妥籌遣散左宗棠又稱袁保恆前奏一出設江皖督撫將應解甘軍之餉藉口遲延湘軍或因糧盡飢潰則大局可慮等語甘軍本有撥定之款江皖督撫斷不敢因袁保恆此奏藉口遷延卽李鴻章赴陝等軍亦卽以籌定入黔之餉利濟師行左宗棠正無庸鯁鯁過慮也至金運昌雷正綰周蘭亭各軍既有缺額卽著左宗棠認真查覈歸併以節餉需陝省應否添軍募勇之處著李鴻章到陝後酌量情形奏明辦理袁保恆不得再行輕率從事將此由六百里諭知左宗棠李鴻章張之萬英翰李鶴年並傳諭袁保恆知之○左宗棠奏甘肅兵事方殷各軍糧餉時虞缺乏亟宜就地籌畫挹注若全恃各省協餉斷難接濟本省制兵向支用本省丁糧銀兩承平日久兵制久荒變亂以來已失守地

方存兵無幾未失守地方懸缺亦多而支放兵糧仍循舊額本縣額徵不敷必於鄰縣估撥以足其數有用之餉糈皆耗於制兵之虛糜臣擬仿照閩浙裁兵節餉章程汰弱畱強擇荒絕之地撥爲兵屯慎選將領督令墾種卽以所獲作爲名糧以其餘照時價估作餉項農隙仍操練技藝庶游手之兵皆可自食其力而甲冑卽寓耰鋤之中其各屬額徵丁糧銀兩擬提充客軍糧餉以歸實際而省採運經費甘省遭賊蹂躪各屬州縣未能一律開徵惟南路較爲完善鞏秦階所屬地丁每年應徵銀十二萬餘兩額糧共七萬餘石雖不能如額徵足若地方官認真整頓涓滴歸公當可日有起色臣見飭鞏秦階道先行查明豐歉議定章程通飭所屬各州縣地方官曉諭各鄉里甲額徵糧石一體全完本色不准折收銀兩額徵地丁隨收隨報由臣勻撥各營支領如有巧立名色從

中舞弊由臣分別參辦其餘各府州縣亦擬次第酌辦庶兵糧皆歸實用於地方軍務兩有神益報聞○予甘肅陣亡提督周和美等祭葬世職○壬午諭吳棠迅解西藏欠餉○癸未諭軍機大臣等李宗義奏殺軍擊賊獲勝見飭追剿一招雪背溝孟家灣等處敗匪竄至木河溝迤西經玉崑設法兜擊宋慶復親率隊伍馳抵哈拉寨該匪分由扎薩旗竄至新廟地方我軍躡及賊蹤奮勇剿擊斃賊甚多敗逆分向東北正北逃竄宋慶見飭馬玉崑蔣東才分路兜擊即著定安李宗義知會宋慶飭令馬玉崑等確探賊蹤乘勢追剿務將此股敗匪悉數殲除沿河托清河堡等處並著定安李宗義檄飭在防將弁嚴密堵禦陝北榆綏延所屬附近河干一帶無土匪潰勇聚擾情事李宗義務當勤加偵探毋稍大意將此由四百里各諭令知之○諭穆圖善奏布置省防請飭左宗

棠籌防東南疏通運道一招回匪紛竄陝疆甘省北路官軍攻剿情形疊經左宗棠詳悉陳奏見在陝境之賊雖已敗竄回甘後路情形稍鬆而金積堡逆回勢仍猖獗零星股匪四出滋擾運道時虞梗阻甘軍糧餉軍火全賴西征糧臺源源接濟乃袁保恆報解正二兩月米折等銀月餘尙無抵甘信息似此轉輸遲滯誠恐兵食缺乏飢潰堪虞刻下甘省東南兩路有無阻隔左宗棠務當分撥各營妥籌布置以顧餉道並飭令西征糧臺將甘軍餉需按月籌解毋稍遲誤蘭州附近之北山阿干鎮等處時有匪蹤竄擾著穆圖善飭令馬步各營分路雕剿嚴加防範金積堡逃匪勾結河州等處回匪肆擾西甯碾伯等境穆圖善已令總兵王仁和酌撥三營馳赴碾伯著卽飭令迅速前進相機堵剿左宗棠亦當妥籌兼顧毋任賊蹤紛竄益肆蔓延將此由五百里各諭令知之○甲

申諭軍機大臣等瑞麟李福泰奏派兵剿辦黎匪殲擒首要各犯一摺崖州黎匪劉振欣等因外委洪雲章派資修理土城膽敢糾集多人將洪雲章戕斃復突入內地焚劫村莊都司吳成龍等帶兵彈壓該匪並勾結各路黎匪圍攻土城吳成龍黎桂香先後戰歿經瑞麟等檄飭署總兵劉成元督同地方文武前往剿辦劉振欣等在大田一帶踞險抗拒官兵進抵大田疊破賊柵生擒首匪多名劉振欣由嶺背竄逸副將王伯熊等追至五指山下河邊將首犯劉振欣擒獲見在東西兩路各村黎人俱已投誠劉振欣等均經訊明正法在事員弁兵勇尙屬奮勉出力著瑞麟等擇尤酌保毋許冒濫儋崖陵水各州縣所屬黎匪獷悍性成平日每易滋事此次劉振欣等糾眾戕官則由於營弁之科派啟釁實屬不成事體嗣後該府所屬文武瑞麟等務須隨時遴選循良安民戢暴

遇有貪劣不職之員卽行參劾並嚴飭該管道府力加整頓毋任
文恬武嬉致滋隱患刻下投誠各路黎人仍著札飭地方官妥爲
撫綏俾安生業在逃餘匪並飭認真搜捕以絕根株所有各屬藉
公科派等弊卽著出示勒石永遠禁止用杜弊端將此各諭令知
之○乙酉諭軍機大臣等豫師奏西甯撫局難恃請酌募兵勇扼
要駐防一摺據稱西甯回族名雖就撫而實則四出焚掠相率爲
常兼以狄河等處黨衆勾結陝同時有圍攻碾伯縣城之前任
辦事大臣玉通困守西甯無餉無兵勢同拘偪若不酌帶兵勇前
往鎮撫必致仍蹈覆轍等語自係實在情形著照豫師所請卽就
平番等處募勇五營先紮碾伯及威遠堡一帶整團修堡以禦外
匪一面疏通道路前赴西甯至西甯城內撫事雖由豫師責成道
員郭襄之照舊辦理然究係權宜之計豫師仍當酌度情形一俟

辦有端倪卽赴新任以資鈐制平番等處回類甚多豫師新募勇
丁務當選擇精審毋令奸匪溷迹其中致有疏失至應需月餉著
戶部於各省協甘餉內每月指撥銀二萬數千兩總歸西征糧臺
催提轉解仍在各省積欠項下劃扣卽著袁保恆遵照辦理惟指
撥需時誠恐緩不濟急並著左宗棠先行借發銀三四萬兩俾得
趕緊招募成軍以保西路大局西甯回族與金積堡聲勢相連見
在金積堡旣難剋期竣事左宗棠兵力勢恐不能兼顧蘭垣省城
防守事宜穆圖善當妥籌鎮撫以爲西甯聲援毋稍疏懈將此由
五百里諭知左宗棠穆圖善豫師並傳諭袁保恆知之○丁亥諭
軍機大臣等定安奏張曜宋慶兩軍剿賊情形李宗義奏殺軍剿
賊獲勝各摺片定安所奏嵩武軍擊賊於黃渠橋等處及蔣東才
在新廟地方擊退竄匪各情與金順李宗義前奏大略相同平羅

一帶竄匪疊經金順會同張曜擊退王家疇莊回匪畏勦乞撫見在曾否呈繳馬匹器械並將悍酋王得等縛獻該逆反覆無常往往藉乞撫爲緩兵之計金順當懷遵前旨認真防範不可稍涉大意其後路竄匪仍當會同張曜督飭派出各軍隨時截勦以杜勾結劉廷劉景芳所帶各隊已由纏金西進著定安飭令探明賊蹤相機兜擊與甯夏一帶官軍聯絡聲勢肅清糧路宋慶一軍於擊新廟竄匪後復在石板廟高莊等處疊次擊賊獲勝擒斬甚多餘眾悉向西奔據獲賊供稱賊目石姓及胡得海兩股先後由金積堡出竄眾各三千人後面仍有陸續竄出等語該逆因糧食缺乏紛紛東竄雖經官軍疊次斬滅人數恐尙不少著定安李宗義知會宋慶仍飭馬玉崑等乘勝追勦務將竄出之匪悉數掃蕩毋任滋蔓劉厚基前經會合蔣東才擊賊於土孟三道河等處著劉典

飭令該總兵隨時與宋慶一軍互相策應遇賊卽擊毋任此剿被
竄其麻地溝防軍並著李宗義飭令實力堵剿毋稍疏懈將此由
五百里各諭令知之○諭劉嶽昭岑毓英奏攻克麗江等城及馬
街等處賊巢會商澂江新興軍情各摺片中路官軍克復彌渡賓
川及紅巖馬街各賊巢北路官軍攻克麗江劍川南路一軍並將
緬甯廳城收復此次各營將弁疊克城池勦辦極爲得手在事出
力文武員弁著劉嶽昭等查明彙案保奏新復之賓川彌渡偏近
大理尙有鎮南姚州雲南縣三城未下著該督撫激勵將弁乘勝
進攻迅圖克復惟官軍深入尤宜穩紮穩進不可稍涉疏虞其永
昌等處之賊並著督飭各軍分路進剿以期次第廓清劉嶽昭岑
毓英親赴中關察看地勢會籌進攻之策卽著將澂江府城迅速
攻克掃蕩逆氛劉嶽昭回省後所有省城布置機宜並著妥爲籌

辦另片奏請將湖南協餉二萬兩作爲馬如龍專餉等語已諭令劉崐照辦仍著劉嶽昭等咨會馬如龍將勇營人數及每月收支餉銀數目隨時咨明該督等查覈報部馬如龍既有專餉卽著責令該提督將新興等處軍務認真辦理迅拔堅城近日馬如龍打仗情形並著該督撫詳細奏聞將此由六百里各諭令知之尋奏馬如龍自辦軍務以來奮勇當先屢次與賊對壘從無避就報聞○飭四川等省迅撥滇餉○予雲南陣亡副將黃文學遊擊牟永昌祭葬世職並賞文學母從一品封典○辛卯諭軍機大臣等蔣志章奏回匪分擾岐鳳見飭各軍合擊並另股復竄北山各摺片回酋崔三等率黨由隴州分股竄入縣頭鎮逼近鳳翔擾及岐山寶雞縣境經總兵李輝武副將邵永齡合力夾擊大挫兇鋒另股由清水太陽寺竄至鳳縣之方石鋪賊蹤飄忽亟須就地殲除方

免滋蔓該撫見飭張福齊督營前往岐鳳兼顧乾醴畱吳士邁所部由汧陽回顧鳳翔會同李輝武各營合力勦辦陳照臺由盤屋前進防賊搶渡渭河布置尙爲周密著卽分飭該員等認真防勦迅掃逆氛漢南一路仍著責成李輝武妥爲兼顧北山伏莽甚多該處地廣兵單難資捍禦刻下定靖等處復有回蹤尤易延擾腹地卽著嚴飭劉厚基等督率防軍力籌堵勦迅將前竄股匪盡數廓清毋任勾結潛藏致貽後患陝省毗連甘境密邇寇氛必須先將本境竄匪掃除自固藩籬方能扼守門戶該撫務當就見有兵力相機籌辦以副委任將此由五百里諭令知之○諭前據李鴻章奏擬令郭松林周盛傳添募馬步各隊並籌議兵餉轉運事宜剋日起程赴陝此時籌辦一切諒已就緒本日據蔣志章奏回匪崔三等率黨數千人從隴州竄徧鳳翔岐山寶雞境內均有賊蹤

另股回匪由清水擾及鳳縣境內北路回匪復竄至定靖交界安邊堡一帶是陝省情形甚爲喫緊該省兵力本單蔣志章甫經抵任於軍務調度機宜未經閱歷必須李鴻章趕緊入陝方可籌商一切相機辦理該督務當剋日起程前往毋稍延緩見在回匪既竄近鳳翔屬邑轉瞬之間卽恐蔓延北路定靖等處如無得力之軍扼剿賊蹤亦易擾及腹地儻李鴻章一時未能啟行或於郭松林等員內酌派勁旅一支先行馳赴陝省探明賊蹤會合秦軍迎頭截剿以期保衛陝疆該督仍迅速部署隨後繼進妥籌剿辦用紓朝廷西顧之憂將此由五百里諭令知之○癸巳諭軍機大臣等定安奏毅軍剿匪疊勝及賊近河干派隊分剿並達爾濟擊賊獲勝各摺片所稱毅軍蔣東才馬玉崑在石板廟高莊擊賊獲勝情形與李宗義前奏大略相同仍著定安李宗義懍遵二十一日

諭旨知會宋慶卽飭馬玉崑乘勝追剿將胡得海各股竄匪悉數殲除並飭蔣東才由神木探剿而前以過後股東竄其分擾準噶爾等旗賊匪是否卽蔣東才等擊敗之賊至達爾濟擊賊之占旦召地方距包頭僅八十餘里該處逼近河干設被逆蹤突竄勢將四處蔓延前據定安奏劉景芳一隊已由包頭起程卽著飭令該總兵探蹤迎擊一面檄飭達爾濟等相機堵剿一面催令成章等隊迅赴河西以資援應李宗義亦當分飭各路防軍遇賊卽擊毋任乘隙旁竄仍會同定安嚴檄馬陞國英等各飭所屬文武隨時偵探實力巡防不可稍涉大意其達爾濟接仗獲勝詳細情形著定安查明具奏並著咨令宋慶迅飭馬玉崑與達爾濟等會合兜擊力殄寇氛將此由五百里各諭令知之○予貴州被戕知縣吳汝謹祭葬世職○甲午諭軍機大臣等英桂卞寶第奏擬派員募

勇馳赴陝甘勦一摺英桂等因聞甘省回匪分股擾竄陝境軍情喫緊擬派總兵劉明燈楊芳桂馳赴鄂省各募楚勇兩營前往陝西聽候左宗棠調遣以資攻勦所籌固爲力顧大局起見惟疊據左宗棠奏稱西征軍餉頗形支絀若遽令劉明燈等募勇入陝恐有兵多餉缺之累劉明燈等向來帶兵旣尙得力著英桂等卽飭令馳赴甘肅軍營聽候左宗棠差遣其應否派令添募勇丁或酌撥隊伍令其統帶勦賊之處均著左宗棠酌度辦理將此由四百里各諭令知之○諭李鶴年奏宜陽刀匪聚眾拒捕見添派隊伍兜拏一摺本年二月間宜陽刀匪張野貓等在黑山頂等處聚眾搶掠並傷害弁兵亟須派隊嚴拏著李鶴年督飭總兵楊長春等分路兜拏務令悉數擒獲以絕根株該匪張野貓等於上年十月間藏匿宜陽境內經該撫飭令河陝汝道廣隆河南府知府陳

肇鏞等會營訪拏乃當時未能弋獲此次又未能先事豫防實屬咎有應得廣隆陳肇鏞均著摘去頂帶宜陽縣知縣恆倫著革職暫行畱任以觀後效如再不知愧奮卽著從嚴參辦將此諭令知之○諭文麟等奏東山躔頭回子滋事見籌辦理等語東山躔頭回子上年聚眾滋事據該回王福晉聲稱實因暴素克一人起釁見經章京玉素普等將該匪擊斃其餘回眾懇請免究該回首犯旣經擊斃餘眾自應設法撫馭著文麟景廉體察情形妥爲安撫毋任別啟釁端如或再行滋事卽當從嚴懲辦魏忠義所署塔爾納沁都司一缺見旣改委徐天秩代理卽著飭令魏忠義將應辦營務及屯田事宜認真辦理以專責成將此由四百里各諭令知之○乙未諭軍機大臣等左宗棠蔣志章奏疊勦竄陝回逆獲勝各營迎擊跟追一摺崔三等匪股竄鳳翔後圖踞陳村經李輝武

等軍疊次擊敗該逆分爲兩股其東竄一股由醴泉高陵竄至渭南河北各渡編紮木筏搶越渭南復經防軍擊退該逆雖屢受懲創而自西而東擾及腹地亟應速加懲辦著左宗棠蔣志章督飭派出各軍務將此股就地殲除毋令四出紛竄其西北敗逸一股見在竄往何處該督撫卽嚴檄將弁覘賊所向躡蹤追剿迅掃逆氛渭北以下渡口甚多並著咨會李鶴年迅調馬德昭李承先統帶數營扼紮同州二華等處與劉端冕等軍聯絡聲勢相機進剿北路安邊堡一帶回匪近日剿辦如何著左宗棠等分投剿洗毋令聯成一氣益肆蔓延將此由五百里各諭令知之○諭總理各國事務衙門奏貴州遵義教案請飭迅結一摺黔省遵義教案前經李鴻章派令道員余思樞前往籌辦迄今尙無端倪該使臣羅淑亞以李鴻章改赴陝西恐貴州教案又復延閣屢次催請迅結

自應妥速辦竣以弭釁端李鴻章係原派查辦大臣見雖未能入黔此案仍須該督一手經理著卽飭令道員余思樞會同黔省派出各員迅將應行查辦事件認真查覈但能折服其心自不至仍前狡執該使臣羅淑亞亦有不令教士任意婪索之語並因新使臣蘭盟將到亟望此案速結一切籌辦機宜該督卽可密飭余思樞妥爲辦理至此案雖由李鴻章派員往辦曾璧光係該省大吏豈得置身事外著卽嚴督派出各員悉心會辦逐層確查覈實持平以自立於不敗之地原摺均著鈔給閱看將此由五百里各諭令知之○丙申以孟夏時享 太廟 上前期親詣行禮○廣江蘇鄉試文武中額各八名